

Na osnovu člana 8. stav (1) Zakona o uvozu i izvozu oružja i vojne opreme i kontrole uvoza i izvoza proizvoda dvojne namjene ("Službeni glasnik BiH", broj 5/03 , 14/03, 33/03 i 14/05), člana 99. stav (3) Zakona o upravi ("Službeni glasnik BiH", broj 32/02), a u skladu sa Poglavljem 4 Izmjena 22 Uputa Stranama glavnog zapovjednika EUFOR-a od 22. juna 2005. godine, ministar vanjske trgovine i ekonomskih odnosa donosi

INSTRUKCIJU

O OBAVEZI PRIBAVLJANJA ODOBRENJA EUFOR-A ZA UVOZ, IZVOZ, TRANZIT I POSREDOVANJE U PROMETU ORUŽJA I VOJNE OPREME

Član 1.

(1) Ovom instrukcijom utvrđuje se obaveza pribavljanja odobrenja EUFOR-a - Najava namjere prijevoza naoružanja, municije i opreme za uvoz/izvoz u/iz Bosne i Hercegovine na Formularu 5 (u daljnjem tekstu: Najava namjere).

(2) Odredbe ove instrukcije primjenjuju se na navedene definicije koje imaju slijedeće značenje:

a) **Vojno naoružanje** - svako ubojno i neubojno sredstvo ili njegov dio, napravljen ili korišten da nanese tjelesnu povredu, da fizički ili na drugi način osigura prednost nad protivničkom stranom. Ova definicija podrazumijeva svo naoružanje koje nije uvršteno u navedenu definiciju civilnog naoružanja, a posebno podrazumijeva slijedeće: teško naoružanje, borbene letilice i helikoptere, opremu za elektronsko ratovanje, nuklearne, biološke ili hemijske agense i laserske naprave ili druge uređaje koji zrače energiju;

b) **Vojna municija** - ovaj izraz uključuje sve vrste projektila koji se ispaljuju na neprijatelja, kao što su: meci, projektili, rakete, čahure, granate, torpeda, bombe i navođeni projektili sa svojim inicijalnim punjenjem, kapisle, upaljači i detonatori, vojni eksplozivi i njihove komponente. Sve komponente municije smatraju se municijom;

c) **Civilno naoružanje** - ovaj izraz odnosi se na oružje koje nije vojno. Civilno naoružanje su sredstva namijenjena za sport i lov, kao što su sačmarice, sportske i lovačke puške, vazdušne puške i pištolji i puške i pištolji za hemijske projekte, signalni pištolji i sredstva sa klinovima za humano ubijanje životinja. U ovu kategoriju još spadaju i starinsko vatreno oružje i poluautomatski pištolji/ revolveri.

d) **Civilna municija** - municija koja se koristi samo za civilno oružje. Tu spadaju i industrijski eksplozivi i sve njegove inicirajuće i neeksplozivne komponente, pirotehnički materijal za vatromete, svijetleće rakete i protivgradne rakete.

Član 2.

(1) Podnosioci zahtjeva koji žele dobiti odobrenje EUFOR-a, moraju dostaviti traženu dokumentaciju odgovarajućem uredu za vezu EUFOR-a bilo uručenjem, faksom, u vidu elektronske kopije ili e-mailom.

(2) Zahtjev za vojno naoružanje i municiju podnosi se preko entitetskih ministarstava odbrane, a zahtjev za civilno naoružanje i municiju podnosi se preko entitetskih ministarstava unutrašnjih poslova.

Član 3.

U cilju provođenja efikasne kontrole iz člana 2. ove instrukcije, entitetska ministarstva dužna su da ostvare saradnju i razmjenu informacija sa nadležnim državnim ministarstvima, Ministarstvom odbrane Bosne i Hercegovine, odnosno, Ministarstvom sigurnosti Bosne i Hercegovine.

Član 4.

Ova instrukcija stupa na snagu osmog dana od dana objavljivanja u "Službenom glasniku BiH".

Broj 01-1-02-8704/05
5. augusta 2005. godine
Sarajevo
